

四庫全書

子部

欽定四庫全書

冊府元龜卷五十九

宋 王欽若等 撰

帝王部

興教化

先王作教化民扶世道俗所以厚人倫端王政也莫不因其自然率其不及使天下敦本而興行回心而嚮道猶水之有源風之偃草也然而教化之流非可家至而人說也故因父子兄弟之親教之以孝弟本上下長幼

之序勗之以慈惠夫婦之際化之節義農桑之功勉以勤苦故舉孝以為民極察廉以為民表或賜帛以敦獎或給復以令養是乃張四維明五教示大順建至治使民德歸厚風俗丕變不疾而速不嚴而化者繇斯道也書曰惠不惠懋不懋勉之之謂也詩曰爾之教矣民胥效矣其在是乎

漢高祖二年詔曰歲舉民年五十已上有修行能帥眾為善置以為三老鄉一人擇鄉三老一人為縣三老與縣

令丞尉以事相教復勿繇戍

惠帝四年正月舉民孝弟力田者復其身

文帝十二年三月詔曰孝悌天下之順也力田為生之

本也三老眾民之師也廉吏民之表也朕甚嘉此二三

大夫之行今萬家之縣云無應令

無孝悌力田之人
可應察舉之令 豈

實人情是吏舉賢之道未備也其遣謁者勞賜三老孝

者帛人五疋悌者力田二疋廉吏二百石以上率百石

者三疋

自二百石以上
每百石加三疋

及問民所不便安而以戶口率

置三老孝悌力田常員計戶口之數以率之增置其員廣教化也令各率其意以道民焉

武帝建元元年四月詔曰古之立教鄉里以齒朝廷以

爵扶世導民莫善於德然則於鄉里先耆艾奉高年古

之道也

六十曰耆五十曰艾

今天下孝子順孫願自竭盡以承其

親外迫公事內乏資財是以孝心闕焉朕甚哀之民年

九十以上有受粥之法

給米粟以為糜粥

為復子若孫令得身

帥妻妾遂其供養之事

元光元年十一月初令郡國舉孝廉各一人

孝謂善事父母者廉

謂清潔有廉隅者

元朔元年十一月詔曰深詔執事興舉孝廉庶幾成風
紹休聖緒今或闔郡而不薦一人其與中二千石禮官
博士議不舉者罪有司奏議曰不舉孝不奉詔當以不
敬論奏可

元狩元年十二月詔曰朕嘉孝弟力田其遣謁者巡行
天下賜孝者帛五疋悌者力田帛人三疋

昭帝元鳳元年三月賜郡國所選有行義者涿郡韓福等五人帛人五十疋遣歸詔曰朕閔勞以官職之事其務行孝弟以教鄉里令郡縣常以正月賜羊酒有不幸者賜衣被一襲祠以中牢

宣帝本始元年遣使者持節詔郡國二千石謹牧養民而風德化

地節三年十一月詔曰朕既不逮蕩民不明反側晨興念慮萬方不忘元元唯恐羞先帝聖德故並舉賢良方

正以親萬姓歷載臻茲然而俗化闕焉傳曰孝弟也者其為仁之本與其令郡國舉孝弟有行義聞於鄉里者各一人

四年二月詔曰導民以孝則天下順今百姓或遭衰經凶災而吏繇事使不得塋傷孝子之心朕甚憐之自今諸有大父母父母喪者勿繇事使得收斂送終盡其子道

神爵四年四月以潁川太守黃霸治行尤異賜吏民有

行義者爵人三級力田一級貞婦順女帛

元帝初元元年四月詔賜孝者帛五疋弟者力田三疋
五年四月賜孝者帛人五疋悌者力田三疋

永光二年二月詔賜孝悌力田帛有差

建昭五年三月詔賜孝悌力田帛

成帝建始元年二月賜孝弟力田帛各有差

三年三月賜孝弟力田爵二級

河平四年正月賜孝弟力田爵二級

鴻嘉二年三月博士行鄉飲酒禮

綏和元年二月賜孝弟力田帛有差

哀帝即位賜孝弟力田帛

平帝元始元年二月班教化禁淫祀放鄭聲六月復負

婦鄉一人

鄉一人取其尤最者

後漢光武建武三年以伏湛為司徒湛奏行鄉飲酒禮
遂施行之

明帝以中元二年二月即位四月賜孝弟力田爵人三

級

永平二年三月郡國縣道行鄉飲酒禮於學校

三年二月賜天下孝弟力田爵人三級

十二年賜天下孝弟力田爵人三級

十七年五月賜天下孝弟力田爵人三級

章帝以永平十八年八月即位十月賜孝弟力田爵人

三級

建武三年三月賜天下孝弟力田爵人三級

四年四月賜孝弟力田爵人三級

元和二年二月乙丑帝耕於定陶詔曰孝弟淑行也力田勞勤也國家甚體之其賜帛人一疋

和帝永元八年賜天下孝弟力田爵人三級

十二年三月賜天下孝弟力田爵人三級

殤帝以元興元年十二月即位賜天下孝悌力田爵人三級

安帝永初二年詔居鄉里有廉清孝順之稱才任理人

者國相歲移名與計偕上尚書公府通調令得外補移

也調
選也

三年正月賜孝弟力田爵人三級

五年閏二月詔至孝與衆卓異者遣詣公車

元初元年正月賜孝弟力田爵人三級

三年十一月初聽大臣二千石刺史行三年喪

文帝遺
詔以日

易月於後大臣遂以為
常至此復遵古制也

六年二月詔賜貞婦有節義穀十斛甄表門閭旌顯厥

行

延光元年二月賜孝悌力田爵人三級

順帝永建元年詔賜孝悌力田爵人三級

四年正月賜孝悌力田爵人三級

陽嘉元年正月詔賜孝悌力田爵人三級

桓帝建和元年正月詔賜孝悌力田爵人三級

魏陳留王咸熙元年令諸郡中正月六條舉淹滯一曰

忠恪匪躬二曰孝敬盡禮三曰友于兄弟四曰勞身潔

謙五曰信義可復六曰學以為已

晉武帝泰始三年十月詔聽士卒遭父喪者非在疆場
皆得奔赴

四年班五條詔書於郡國一曰正身二曰勤百姓三曰
撫孤寡四曰敦本息末五曰去人事

六年十二月帝臨辟雍行鄉飲酒之禮詔曰禮義之廢
久矣今乃復講肄舊典賜太常絹百疋承博士及學生
牛酒咸寧三年復行其禮

惠帝元康九年臨辟雍行鄉飲酒之禮

後魏孝文太和十一年冬十月甲戌詔曰鄉飲之禮廢則長幼之叙亂孟冬十月民閑歲隙宜於此時導以德義可下諸州黨里之內推賢而長者教其里人父慈子孝兄友弟順夫和妻柔不率長教者具以名聞

後周武帝天和元年詔諸有三年之喪或負土成墳或寢苦骨立一志一行可稱揚者仰本部官司隨事言上當加弔勉以勵薄俗

隋高祖開皇九年詔曰往以吳越之野羣黎塗炭干戈
方用積習未寧今率土大同含生遂性太平之法方可
流行凡我臣僚澡身浴德開通耳目宜從茲始喪亂已
來緬將十載君無君德臣失臣道父有不慈子有不孝
兄弟之情或薄夫婦之義或違長幼失叙尊卑錯亂朕
為帝王志存愛養時有臻道不敢寧息內外職位遐邇
黎人家家自脩人人克念使不軌不法蕩然俱除兵可
立威不可不戢刑可助化不可專行禁衛九重之餘鎮

守四方之外戎旅軍器皆宜停罷世路既夷羣方無事
武力之子俱可學文人間甲仗悉皆除毀有功之臣降
情文藝家門子姓各守一經令海內翕然高山仰止京
邑庠序爰及州縣生員受業升進於朝未有灼然明經
高第此則教訓不篤考課未精明勅所繇降茲儒訓
煬帝大業八年四月詔孝弟力田義夫節婦並加旌異
表其門閭

唐高祖武德元年五月即位詔孝子順孫義夫節婦旌

表其門閭孝悌力田鰥寡孤獨量加賑卹

四年七月詔孝子順孫義夫節婦所在詳列旌表其門

閭

太宗初即位詔節義之夫貞順之婦州郡列上旌表門

閭

貞觀三年四月詔孝義之家各賜米五石

四年十月詔孝子順孫義夫節婦隨事褒顯旌表門閭
六年詔天下牧宰每年親率長幼行鄉飲酒之禮

十三年正月詔孝子順孫義夫節婦咸表門閭
十七年四月詔孝子順孫義夫節婦賜物有差

高宗永徽元年五月辛亥詔曰通喪下達聖哲貽訓緯
俗經邦咸率茲道至於嬰蓼莪之巨痛懷顧復之深慈
得自天經含生罔極者也爰自周餘七雄交爭逮乎漢
末三方競峙金草亟動鉦鼓日聞先王典章掃地將盡
遂令三邊武猛墨經而扈戎麾士卒驍雄素冠而事巡
警亦有內無繼體傍闕同氣几筵安寄奠醑不親廼睠

於斯再深警歎朕膺茲景命君臨九野中區富教外俗承規宜有解張以勵風俗衛士掌閑幕士等遭喪合期
年上者宜聽終制三年

六年正月詔孝子順孫義夫節婦咸表門閭

顯慶二年三月詔曰如聞公主出適王妃作嬪舅姑父母皆降禮答拜此乃子道云替婦德不修何以式序家邦儀刑列閭自今以後可明加禁斷使一依禮法若更有以貴加於所尊者令所司隨事糾聞

乾封元年有事於泰山詔孝子順孫義夫節婦表其門
間終身勿事

永淳二年十二月詔孝子順孫義夫節婦表其門間終
身勿事

中宗神龍元年九月詔曰在外百姓婚娶之家百兩未
行二親俄殞停哀之際便即成婚遂輟首經之容敢伸
花盃之禮寧戚之心安寄罔極之心闕如敗俗傷風莫
過於此自今已後宜即懲革

睿宗唐隆元年七月制鄉飲之禮為日已久宜令諸州
每年遵行鄉飲之禮

玄宗開元十一年封泰山禮畢詔孝子順孫義夫節婦
旌表門閭終身勿事

十七年四月謁乾陵禮畢詔孝子順孫義夫節婦旌表
門閭

二十年十一月詔孝子順孫義夫節婦旌表門閭終身
勿事

二十三年正月藉田禮畢詔孝子順孫義夫節婦並旌表其門

天寶元年正月改元詔曰如聞百姓之內或有戶高丁多苟為規避父母在乃別籍異居宜令州縣勘會其一
家之中有十丁已上者放兩丁征行賦役五丁已上者
放乙丁即令同籍共居以敦風化

三載十二月制曰自古聖王皆以孝理天下五常之本
百行莫先行移於國則忠於長而為順有天下孝行過

人鄉間欽伏者宜令所繇郡縣長官具以名薦其有父母見在別籍異居虧損名教莫斯為甚親歿之後亦不得分析自今已後如有不孝不恭傷財破產者宜配隸磧西用清風教

七載五月詔曰古者鄉有塾黨有序所以明尊卑之儀正長幼之序風化之道義在於此先置鄉學務令敦勸如聞郡縣之間不時訓誘閭巷之內多虧禮節致使言詞鄙褻少長相陵有玷清猷何成雅俗自今已後宜令

郡縣長官申明條式切加訓導如有禮義興行及紀綱不立者委採訪使明為褒貶具狀聞奏又詔曰式閭表墓追賢紀善事有勸於當時義無隔於異代其忠臣義士孝婦烈女史籍所載德行彌高者所在亦置一祠宇量事致祭

十三載二月詔曰厚其風俗五教之旨聿興貴於丘園十翼之風斯在其士庶間衆推孝弟累代義居高尚確然隱遁岩穴者委採訪使博訪聞薦其孝義之人已經

旌表雍睦無易純至有終著美鄉閭深可嘉尚各賜勲
兩轉

肅宗初即位詔孝子順孫義夫節婦旌表其門閭

至德三年二月大赦詔天下孝義門各與一子官委採
訪使具名聞奏量文武處分自逆賊已來有匹夫匹婦
節義可量者並旌表其閭墓

乾元元年四月詔百姓中有事親不孝別籍異財玷污
風俗虧敗名教先決六十配隸磧西有官品者禁身聞

奏

十月詔天下義夫節婦孝子順孫旌表門閭終身不事
上元元年閏四月詔義夫節婦孝子順孫旌表門閭終
身不事

二年九月詔義夫節婦孝子順孫旌表門閭終身勿事
三年建卯月辛亥詔孝子順孫義夫節婦旌表門閭終
身不事

代宗寶應元年四月即位五月詔孝悌力田諸州刺史

宜搜揚聞薦

二年七月詔孝悌力田本州各以名薦

廣德二年二月乙亥詔孝子順孫義夫節婦旌表門閭
終身勿事

大歷元年十一月詔孝悌力田未經薦用者委所在官
長具以名聞

五年六月詔孝子順孫義夫節婦事迹明著者特加旌
表

德宗貞元四年詔孝悌力田聞於鄉里所在官長具名
聞奏

順宗以貞元二十一年正月即位二月詔曰孝子順孫
義夫節婦旌表門閭重加優卹

四月又詔天下孝子順孫先旌表門閭者委所管州縣
各加存卹

憲宗元和四年十月冊皇太子大赦詔孝子順孫先旌
表門閭者委所管州縣各加存卹

七年十月詔天下孝子順孫先旌表門閭者委所管州縣各加存卹

穆宗長慶元年三月幽州劉總歸闕詔管內有節義因事亡歿者量加追贈

七月詔孝子順孫義夫節婦事迹彰顯為衆知者量加存卹

昭宗天祐元年詔應天下有孝子順孫義夫節婦事迹彰顯為衆所知者仰所在長吏標錄聞奏旌表門閭

哀帝天祐四年四月詔孝子順孫義夫節婦有司以名聞必當旌表

後唐莊宗同光元年四月即位制曰鄉里有孝子順孫義夫節婦委所在長吏錄其節行以具奏聞盡據典章必行旌表教之為本義禮是先德之所宗昭本在上其民間有曾經三世以上不分居者並與蠲免諸雜差徭十月詔其有義夫節婦孝子順孫並宜旌表門閭量加

賑給

二年二月詔曰義夫節婦孝子順孫並合搜揚以行旌表

明宗天成二年十月辛丑詔許國之心忠貞為本承家之法孝友為先應天下有孝子順孫義夫節婦兄弟繼世義居者隨處長吏聞奏當行旌表

三年八月帝聞隨鄧復郢均房之間父母骨肉有疾以竹竿遙致粥食於病者之側出嫁女父母有疾夫家亦不令知聞哀始奔喪者勅曰萬物之中人曹為貴百行

之內孝道居先凡戴北辰並遵皇化備聞南土多爽時
風皆傾事鬼之心不守敬親之道於父母如此無行被
日月何以立身弊久積於鄉閭化全繇於長吏昔西門
豹一縣令耳尚能投巫百姓保女子之愛絕河伯之虞
斷自一時傳於千古况位居侯伯化洽封廵豈不能宣
北闕之風變南方之俗宜令隨處觀察使刺史丁寧曉
告自今後父母骨肉有疾者並須日夕專切不離左右
看侍使子奉其父母婦事其舅姑弟不慢於諸兄姪不

怠於諸父如或不移故態老者卧病少者不勤侍養子女弟姪並加嚴斷出嫁女父母有疾不令其知者當罪其夫及舅姑

四年三月中書奏孔子有言曰教以孝所以敬天下之為人父者教以悌所以敬天下之為人兄者教以忠所以敬天下之為人君者往聖深旨中古明規方當孝理之朝尤重人倫之本今後羣臣內有乞假覲省者欲請量賜茶藥所貴勸人之善表主之恩誠有益於皇猷且

無損於國勢況在班行有父母者甚少既資風化動挂宸衷從之

長興二年八月壬申勅朕聞教化之本禮讓為先欲設規程在循典故蓋以中興之始兆庶初安將使知方所以漸誘准儀制令道路街巷賤避貴少避長重避輕去避來有此四事承前每於道途立碑刻字令路人皆得聞見宜令三京諸道州府各遍下管內縣鎮准舊例於道路明置碑雕刻四件事文字兼於要會坊門及諸橋

柱刻碑曉諭路人委本縣所繇官司共切巡察有敢犯者科違勅之罪貴在所為簡易所化弘多既禮教興行則風俗淳厚庶皆順序益致和平

晉高祖天福元年閏十一月壬午勅義夫節婦孝子順孫委逐道奏聞當加旌表

六年八月詔孝子順孫義夫節婦並與旌表門閭

少帝以天福七年六月即位七月制曰敦崇孝義旌表門閭式恢王化之基用正人倫之本應有孝子順孫義

夫節婦委逐處長吏具名奏聞當議旌表

漢高祖乾祐三年正月制義夫節婦孝子順孫仰具奏聞即議旌表

周太祖廣順元年正月即位制曰孝子順孫義夫節婦所宜旌表以勵時風

二年十一月丙子詔曰應内外文武臣僚幕職州縣官舉選人等今後有父母祖父母亡歿未經遷葬者其主家之長不得輒求仕進所繇司亦不得申舉解送如是

卑幼在下者不在此限

顯德元年正月詔曰應孝子順孫義夫節婦州縣以名聞者並與旌表門閭

世宗以是月丙申即位三月詔曰其有孝子順孫義夫節婦所宜旌表以厚人倫

冊府元龜卷五十九

欽定四庫全書

冊府元龜卷六十

宋 王欽若等 撰

帝王部

立制度

聖人體國經野設官分職制作法度綱紀生民三代以
還詳於典禮兩漢而降布在簡編故有制爵祿以懋功
庸定車服以辨名數設闕梁之禁以譏乎姦立符契之
規以謹乎信著休息之令以休息官司定喪紀之宜以

正雅俗酌民情而為之節緣世變而為之文時被大中
建茲彛憲上得其道下知其方尊國庇民何莫繇此於
戲傳云名不正則言不順言不順則事不成又曰作法
於涼其弊猶貪然則王者之立制也誠宜慎其名而慮
其弊焉

漢高祖五年五月詔曰七大夫公乘以上皆高爵也

七大

夫公大夫之爵七故謂之七大夫公乘第八爵也諸侯子及從軍歸者甚多高

爵吾數詔吏先與田宅及所當求於吏者亟與

亟急也爵

或人君上所尊禮

爵高有國邑者則自君其人故云或人君也上謂天子

久立吏

前曾不為決

有辨訟及陳情者不早決斷

甚無謂也異日秦民爵公

大夫以上令丞與亢禮

亢者當也言高下相當無所屈

今吾於爵非輕

也吏獨安取此

於何取此輕爵之法

且法以有功勞行田宅

行猶付與也

今小吏未嘗從軍者多滿

多自滿足也

而有功者顧不得

顧反

也若人反顧然

背公立私守尉長吏教訓甚不善

守郡守也尉都尉也長吏

謂縣之長令也

其令諸吏善遇高爵稱吾邑

稱猶副也

且廉問有不

如吾詔者以重論之

八年三月令公爵非公乘以上母得冠劉氏冠賈人母

得衣錦繡綺縠紵紵屬操兵乘騎馬

賈人坐販賣者綺文繒也即今之細

綾也締細葛也紵織紵為布及紵也屬織毛若今褐及氈氈之類也操持也兵凡兵器也乘駕車也騎單騎也

十一年詔諸侯王得自除內史以下漢獨為置丞相

文帝二年九月初與郡守為銅虎符竹使符

謂各分其半右留京

師左以與之

十月詔曰朕聞古者諸侯建國千餘各守其地以時入

貢民不勞苦上下驩欣靡有違德今列侯多居長安邑

遠所食之地吏卒給輸費苦而列侯亦無由教訓其民

其令列侯之國為吏及詔所止者遣太子

為吏謂為卿大夫者詔所

止時以恩愛見留

十一年三月除闕無用傳

景帝中六年五月詔曰夫吏者民之師也車馬衣服宜

稱稱其官也

吏六百石以上皆長吏也

長大也六百石位大夫

亡度者

或不吏服出入閭里與民亡異令長吏二千石車朱兩

輜

據許慎字登說輜車之蔽也左傳云以藩載樂盈即是有鄣蔽之車也

千石至六百石

朱左轡車騎從者不稱其官衣服下吏出入閭巷亡吏

體者二千石上其官屬三輔舉不如法令者

謂主爵中尉及左右

內史皆上丞相御史請之先是吏多軍功車服尚輕故為

設禁

武帝征和二年初置城門屯兵更節加黃旄以扈太子

發節以戰故加其上黃以別之

元帝初元五年冬從官給事官司馬中者得為大父母

父母兄弟通籍

司馬中者宮內門也籍者為二尺竹牒計其年紀名字物色縣之宮門案者相

應乃得入也從官親近
天子嘗侍從者皆是

哀帝綏和二年四月即位六月詔除任子令博士弟子
父母死予寧三年

平帝元始三年夏安漢公奏車服制度吏民養生送終
嫁娶奴婢田宅器械之品

後漢光武初伏波將軍馬援上書曰臣所假伏波將軍
印書伏字犬外嚮城臯令印臯字為白下羊丞印四下
羊尉印白下人人下羊即一縣長吏印文不同恐天下

不正者多符印以為信也所宜齊同薦曉古文字者事
下大司空正郡國印章奏可

建武中杜詩為南陽太守初禁網尚簡但以璽書發兵
未有虎符之信詩上疏曰臣聞兵者國之凶器聖人所
慎舊制發兵皆以虎符其餘徵調竹使而已符策合會
取為大信所以明著國命歛持威重也間者發兵但用
璽書或以教令如有姦人詐偽無由知覺愚以為軍旅
尚興賊虜未殄徵兵郡國宜有重慎可立虎符以絕姦

端昔魏之公子威傾隣國猶假兵符以解趙圍若無如
姬之仇則其功不顯事有煩而不可省費而不得已蓋
謂此也書奏從之

和帝元年六月己酉初令伏閉盡日

漢官舊儀曰伏日
萬鬼行故盡日閉

不干
它事

安帝元初三年初聽大臣二千石刺史行三年喪

文帝
遺詔

以日易月於後大臣遂以
為常至此復遵古制也

建光元年復斷大臣二千石以上服三年喪

桓帝永興二年二月初聽刺史二千石行三年喪服

永壽二年春正月初聽中官得行三年服

中官常侍以下

魏明帝以公卿黼黻衮衣之飾擬於至尊多所減損始制天子服刺繡文公卿服織成文及帝受命遵而無改
晉武帝泰始三年初令二千石得終三年喪

太康四年制依漢故事給九卿朝車駕四及安車各一

乘

七年始制大臣聽終喪三年

先是鄭默拜太鴻臚遭母喪舊制既葬還職默遂自

陳懇至久而見許遂改法定
令聽大臣終喪自默始也

後魏明帝永興三年詔侍臣常帶劍

孝文延興二年五月詔軍警給璽印傳符次給馬印

太和十年四月始制五等公服

十七年九月詔廝養之戶不得與士民婚有文武之才

積勞應進者同庶族例聽之

十八年十二月草衣服之制

十九年九月丁亥詔曰諸有舊墓銘記見存昭然為人

所知者三公及位從公者去墓三十步尚書令僕九列
十五步黃門五校十步各不聽墾植

二十年二月壬寅詔自非金草聽終三年喪

宣帝景明四年閏九月禁大司馬門不得車馬出入

孝明孝昌元年十一月辛亥詔曰大孝榮親著之昔典

故安平菴耆諸子滿朝

臣欽若等曰晉安平王
字年九十三有九子

自今諸

有父母年八十以上者聽居官祿養溫清朝夕

孝莊建義元年五月詔以舊叙軍勲不過征虜自今

以後依前式以上餘階積而為品其從輿駕北來之徒
不在此例悉不聽破品受階破階請帛

後周武帝保定四年三月初令百官執笏

建德二年六月詔諸軍符旗皆畫以猛虎鷲鳥之象

三年正月初服短衣

四年四月初令上書者並為表於皇太子以下稱啓

六年九月初令民庶以上唯聽衣綢綿絲布絹綾紗絹
綃葛布等九種餘悉停斷朝祭之服不拘此例

宣政元年三月初服常冠以皂紗為之加簪而不施纓
遵其制若今之折角巾也

隋高祖開皇三年五月改傳國璽曰受命璽

四年四月乙亥勅總管刺史父母及子年十五以上不
得將之官

九年四月頒木魚符於總管刺史雌一雄一

十年十月頒木魚符於官五品以上

十五年五月制京官五品以上佩銅魚符七月制九品

已上官以理去職者聽並執笏

十六年六月辛丑詔九品以上妻五品以上妾夫亡不得改嫁

十七年頒銅虎符於驃騎車騎府

煬帝大業五年二月庚子制魏周官不得為陰六月壬戌制父母聽隨之官

六年詔從駕步遠者文武官等皆戎衣貴賤異等雜用五色五品以上通著紫袍六品以上兼用緋綠胥吏以

青庶人以白屠商以皂士卒以黃

唐高祖初為唐王頒銀菟符於諸郡

武德元年九月改銀菟符為銅魚符

二年二月詔文官遭父母喪聽去職

先是帝從容謂侍臣曰隋末以來多

有叛逆從生之罪所及使多人有子姓皆令外繼簿籍雖別居處猶同至有無其人妄為承嗣非直誣罔鬼神且亦棄同即異非朕興化之意也有如此輩即令正之尚書左丞崔善為進曰欲求忠臣必於孝子比為時多金草頗遵墨經之義丁憂之士例從起服無識之輩衣冠以變無復戚容飲會之時燕啖自若如不糾劾恐傷風俗高祖曰既奪其情安可責其卒禮

七年四月詔遭父母喪者聽終制

太宗貞觀元年十一月己未制子弟年十九以下聽隨父兄之官

四年八月丙午詔曰車服以庸昔王令典貴賤有節禮經彛訓自末代澆浮采章訛雜卿士無高卑之序兆庶行僭侈之儀遂使金玉珠璣靡隔於工賈錦繡綺縠下通於皂隸習俗為常流蕩亡反因循已久莫能懲革朕繼踵百王欽承寶運思弘典制垂範後昆永鑒前失義

存釐改其冠冕制度已備令文至於尋常服飾未為差
等今已詳定具如別式宜即頒下咸使聞知於是三品
以上服紫四品以下服緋六品七品以綠八品九品以
青婦人從其夫也

八年四月帝初服翼善冠賜貴臣進德冠因謂侍臣曰
幘頭起周武帝蓋取於軍容耳今海內無虞當息武事
此冠頗採古法無類幘頭廼宜常服可與袴褶通用

十一年二月丁巳詔曰佐命功臣義深舟楫或定謀惟

幄或身推行陣同濟艱危克承鴻業追念在昔何日忘
之使逝者無知咸歸寂寞若營魂有識還如疇曩居止
相望不亦善乎漢氏使將相陪陵又給以東園秘器篤
終之義恩意深厚古人之志豈異我哉自今已後功臣
密戚外德業尤著如有薨亡宜賜塋地一所及其祕器
使其窆窆之時喪事無闕所司依此營備稱朕意焉

十月癸丑詔曰乾坤合德爰著易簡之功君臣一體克
成中和之治遠取諸物若舟楫之濟巨川近取諸身猶

股肱之載元首同心叶契存歿以之故諸侯列葬周文始創其禮大臣陪陵魏武重申其制去病佐漢還奉茂陵之塋夷吾相齊終托牛山之墓茲益往聖垂範前賢遺則錄曩昔之宿心篤始終之大義者也皇運之初時逢交喪掃除多難光啓鴻業謀臣武將競進轅門之前明德異才爭趨魏闕之下或雲雷伊始功參締構或光華在旦績著弼諧及密戚懿親舊齒宿德委質先朝特蒙殊遇者自今已後身薨之日所司宜即以墓地並給

東園秘器事從優厚庶敦追遠之義以申固極之懷

二十二年癸卯令百僚朔望袴褶以朝

高宗永徽二年四月開府儀同三司及京官文武職事
四品五品並給隨身魚

三年二月帝以天下無虞百姓務簡每至旬暇百寮許
不視事

五年八月己未詔五品以上薨卒者隨身魚不必追收
顯慶元年四月制文武官人五品以上老及病不因罪

解者並聽同致仕例

龍朔二年六月乙丑初令僧尼道士女冠等致敬父母
咸亨三年五月始令京四品五品職事佩銀魚袋

上元元年八月戊戌詔一品已下文官並帶手中笄袋
刀子磨石其武官欲帶手中笄袋者亦聽文武官三品
已上服紫金玉帶四品服深緋金帶五品服淺緋金帶
六品服深綠七品服淺綠並銀帶八品服深青九品服
淺青並鍤石帶庶人服黃銅鐵帶先是九品以上入朝

參及視事聽兼服黃雉陽尉柳延夜行為部人所毆帝聞之以章服錯亂下詔申明之自此朝參行列一切不許著黃

辛丑詔公私齋會及參集之處道士女冠在東僧尼在西不須更為先後

三年閏三月詔曰制勅施行既為永式比用白紙多有蟲蠹自今以後尚書省頒下諸司諸州及下縣宜並用黃紙其承制勅之司量為卷軸以備披簡

中宗神龍二年八月制京官五品已上依舊式佩銀魚袋

九月戊辰詔停京官六品已下著緋袴褶令各依本品為定

景龍元年十月勅宮殿門皇城門京城門禁苑門左右內外各給交魚符一合巡魚符一合左廂給開門魚一合右廂給閉門魚一合左符付監門掌交番巡察每夜並非時開閉則用之

睿宗景雲二年四月制九品已上一品已下文武依上
元故事帶手巾筭袋武官咸帶七事鞞鞞並足其腰帶
一品已下五品已上並用金六品七品並用銀八品九
品共用鍤石魚袋著紫者金袋著緋者銀袋

玄宗先天二年三月癸巳詔制勅表狀書奏牋牒年月
等數作一十二三十三十四十字

開元二年閏二月癸亥令道士女冠僧尼致拜父母

三月癸卯詔曰章服所施貴賤攸別苟容僭越未為獎

勸承前諸軍人多有借緋及魚袋者軍中卑品此色甚多無功賞借深非道理宜勅諸軍鎮但是從京借魚袋及無灼然功者軍中權借者並委州軍長官勅到並即收取待立功日據功合得即將已上者委軍將先借後奏其靈武和戎大武幽州鎮軍赤水河源瀚海安西定遠等軍既臨賊衝事籍懸賞量軍大小各封賞金魚袋五十枚並委軍將臨時行賞

七月戊戌詔曰雕文刻鏤衣紉履絲習俗相誇殊塗競

爽傷風敗俗為弊良久珠玉錦繡既令禁斷准式三品
已上飾以玉四品已上飾以金五品以上飾以銀者宜
於腰帶及御盞酒杯杓依式自外悉鑄為鋌婦人衣服
各隨其夫子其已有錦繡衣服聽染為皂成段者官為
市取天下更不得採取珠玉刻鏤器玩造作錦繡珠繩
織成帖緇二色綾綺羅作龍鳳禽獸等異文字及堅摑
錦文者決杖一百受僱工匠降一等科之兩京及諸州
舊有官織錦坊悉停是月又詔京官所帶跨巾箠袋每

朝參日著外官牙日著餘日停

五年九月戊申詔曰君臣之間不當有隱敷納之事必
在無私比年百司及諸使奏陳皆侍仗下頗乖公道須
有草正自今已後非灼然秘密不合彰露者並令封狀
奏如文書浩大事理交雜者仍進先狀其史官自依舊
例

六年七月庚申詔曰有司及奏事皆合對狀公言比日
已來多仗下獨奏宜申明舊式誥語令知如緣曹吏司

細務及有秘密不合對仗奏者聽仗下奏

十二年詔曰朱紫貴服所以分別班品自非有德有功不可輕為賞借自今已後諸軍節度大使灼然有知功勞須權行給賞任量借色及魚袋仍具狀奏

十三年詔有司試天下僧尼年六十已下者限落者退還俗不得以坐禪對策儀試諸寺三階院通入大院不得有異

十七年八月戊辰詔曰僧尼數多踰濫不少先經磨勘

欲令真偽區分仍慮猶有非違都遣括檢聞奏憑此造籍以為準繩如聞所繇條例非愜致姦妄轉更滋生因即舉推罪者使衆宜依開元十六年舊籍為之更不須造寫自今已後綱維大德侍養權隸不得輒于外取

二十一年七月詔曰道教釋教其來一體都忘彼我不自貴高近者道士女冠稱臣子之禮僧尼企踵勤誠請之儀以為佛初滅度付囑國王猥當負荷願在宣布蓋欲崇其教而先於朕者也自今已後僧尼一依道士女

冠例無拜其父母宜增修戒行無違僧律興行至道俾在於此

二十二年諸道採訪使華州刺史李尚隲等奏請各置印從之

二十三年六月吏部尚書李嵩奏曰伏見告身印與曹印文同形同參雜難以區分望請准司勳兵部印文中加告身兩字許之

二十四年二月壬戌許寒食通清明四日為假

二十五年五月丙子詔曰緋紫之服班命所崇以賞有功不可踰濫如聞諸軍賞借人數甚多曾無甄別是何道理自今已後除灼然有戰功餘不得輒賞

十一月丁亥御史大夫李適之奏曰臣伏以朝服准式皆合備具比來有稱慘故式致乖疎臣望自今已後每當正止及緣大禮應朝官并六品清官並服朱衣餘六品以下望許通著袴褶朔望日請依舊文武官朝集使並服袴褶如有慘故准式不合著朱衣袴褶者其日聽

不入朝自餘應合著不著者請奪一月俸以懲不恪其
蕃官望不在此限如情愿著者請聽餘望依今式許之
天寶元年正月一日改元詔曰文宣垂訓事必正名而
黃鉞古來以金為飾金者應五行之數有肅殺之威去
金稱黃理或未當其黃鉞宜改為金鉞副威武之義焉
三載九月詔曰頃叙功勞累增勲級上柱國外許及周
親是謂賞延載榮宗族廻充賜物匪厚朝恩其准格上
柱國外有餘勲廻授周親

五載六月勅三伏內令宰相辰時還宅

七月勅應緣玉璽及符璽既改為寶其璽書宜改為寶

書

秦有符璽令歷代遵之唐長壽中改為神璽傳國及六璽並為寶神龍初復為璽開元初又改為寶也

六載六月詔曰立身揚名所以廣孝流根自禁亦在推

恩既切因親之心須開議事之制其内外文官五品已

上官父祖無資蔭者其所用蔭宜同子孫用蔭之例五

服之紀宜所致及三年之屬以報免懷齊斬之殊雖存

出母之致顧復之慕何中有子之思其出嫁母宜終服

三載又詔曰重門夜開以達陽氣羣司朝宴樂在時和
屬此上元當修齋籙其於賞會必備葷羶比來因循稍
將非便自今已後每至正月改取十七十八十九日夜
開坊市門仍永為常式

七載正月太常卿韋韜奏御案褥牀帷等望去紫用赤
黃從之

十載正月詔曰禮之王制垂範作程亦既觀德訓人孝
敬故天子七廟諸侯五廟大夫三廟士一廟孝享奉先

禮文有辨令三品已上乃許立廟永言廣敬載感于懷
其京官正員四品清望官及五品清官並許立私廟是
載改傳國寶為承天大寶

代宗寶應二年三月戊子有司奏中書門下五品官准
式賜物並同四品及叙三品即不霑恩並御史中丞自
今已後望許叙名從之

廣德二年二月戊午詔曰三年之喪謂之達禮自非金
草不可從權其文官自今已後並許終制一切不得輒

有奏請

大歷七年秋七月壬辰勅中元前一日後一日宜准舊例並休假

十三年詔自今已後寒食通清明休假五日

德宗貞元三年十月復降魚書停刺史務准令刺

昏降魚符合之然後受命自至德以來多不施行又郎將怙權代刺史悉稟其教令魚符廢及是漳州刺史坐事將鞫之有司復請降魚書停務從之求其書式不獲乃創魚書曰勅漳州緣刺史張憇有犯令遣監察御史蘓弁往彼停務問推宜知

四年正月乙卯詔曰常叅官比來請假東都拜掃多廢曠職事任遣子弟以申情禮

五年正月乙卯詔曰四序嘉辰歷代增置漢崇上巳晉紀重陽或說禳除雖因舊俗與衆共樂誠洽當時朕以春方發生候及仲月勾萌畢達天地和同俾其昭蘓宜助暢茂自今宜以二月一日為中和節以代正月晦日備三令節之數內外官司休假一日於是宰臣李泌奏中和節請令文武百僚以是日進農書司農獻種桂之

種王公戚里上春服士庶以刀尺相問遺村社作中和酒祭勾芒以祈年穀從之

六年三月丙午加寒食假寧七日

八月初造藍田渭橋等鎮遏使印凡二十三紐九月初收諸道進奏院官印三十紐悉碎之

七年三月初賜節度觀察使新制時服尚方織作呈閱所宜帝曰頃來賜衣文綵不常非制也朕今思之節度使以鵠銜綬帶取武毅以靖封內觀察使以鴈銜儀委

取其行列有序收人有威儀也

儀委瑞草也瑞應圖云王者愛人則瑞草生也

十一月令常參官入閣不得奔走周親已下喪朝會禁

慘服俄又命服衣綾袍金玉帶

初金吾將軍沈房有弟喪衣慘服入閣帝問宰

相董晉等對曰准式許周已下服縵不合衣淺色帝曰南班何得有之曰因循而然又問冠冕之制曰古之服冠冕者動有珮玉之響所以飾步也夫至敬之地步武有常不趨而奔致僵君前虧敬慎也在朝武士袍以綾五品已上帶服金玉取其文綵畫飾以奉上也是以禹悉衣服而致美乎蔽冕君親一致昔尚書郎含香老萊子綵服皆此義也服純縵非制也帝乃詔各從舊制

八年五月初令授臺省官者各具舉主於授官詔

先是郎官

缺左右丞舉之御史缺大夫中丞舉之詔書不具所舉及趙懜陸贄為相建議議郎官不宜專于左右丞宜令尚書及左右丞侍郎各舉其可詔書著具所舉官名御史亦如之異日考殿最以觀舉主能否從之未幾皆不行閏十二月門下省奏郵驛條式應給紙券除門下外諸使諸州不得給往還券至所詣州府納之別給券俾還其常叅官在外除授及分付假寧往來並給券從之

十年二月詔曰君臣之際義莫重焉每聞薨殂深用惻悼宜厚哀榮之禮以申終始之恩文武朝臣有薨卒者自今已後其月俸料宜全給仍更准本官一月俸料以

為贈若諸司三品以上官及尚書省四品官仍令有司

舉舊令聞奏行弔祭之禮務從優備用稱朕懷

初左庶子雷威

以是月朔卒有司以故事計其月俸以日數給之帝聞之故有是命以廣恩澤無幾有致仕官卒者有司以官雖致仕而朔朔望請悲同正官卒者給賻從之

三月初置司封司勳考功甲庫印各一

十一年二月置度支水運供軍印

四月勅書賜南詔異牟尋及子閣勸清平官鄭回尹仇

寬等各一書書左始列中書二官宣奉行復舊制也

五月初鑄河東監軍之印監軍有印自此始也

十三年七月宗正卿嗣吳王獻奏簡王府諮議叅軍嗣寧王子淑塋請鹵簿宰臣等議以子淑官卑不合給特詔令給因下詔自今已後嗣王薨日宜令所司供鹵簿永為常式

憲宗元和元年三月戊辰詔常叅官寒食拜墓在京兆府界內者聽進止

八月甲申御史臺奏新授常叅官在城未上及在外未

到假故等准令式職事官假故滿百日即合停解其未
上官等並無正文武或滿百日無憑舉奏請自今已後
如有在城授官疾病未上者在外授官勅到後計水陸
程外滿百日者並停解從之

三年二月詔朝官寒食拜掃及出城任假內外來不須
奏聽進止

四年三月鹽鐵轉運使李異奏職魚兩使請各為一印
許之

五年四月庚寅御史中丞王播奏准故事御史到館驛已處上廳中使後至即就別廳如中使先至御史亦就別廳近日多不遵守中使或不諳往例貴欲逾越御史若不守故事俱失憲章喧競道途深乖事體伏請各令遵奉故事異其守分制可其諸司三品官及中書門下尚書省官或出銜制命或入赴闕庭諸道節度觀察使赴本道及朝覲并前節度觀察使勅追赴朝廷者亦准

此先是監察御史元稹自東臺赴闕至敷水驛宿上廳中官仇士良後至爭廳門閉所入詰詈稹稹襪而走

聽後士良隨以鞭擊積傷面遂煎以他事坐貶官臺司因請定制焉

六年十二月甲申詔立戟官中大夫守京兆尹上柱國
臨淄縣開國男賜紫金魚袋元義方朝議大夫守尚書
戶部侍郎判度支護軍賜紫金魚袋盧坦立戟雖令式
所著似有關文而臺閣相承久為定制盧坦元義方如
有所見即令上聞造次而行殊乖審慎宜各罰一月俸
料其戟仍令所司收納左司郎中陸則勾簡之任發付
不精禮部員外郎崔備工部員外郎元祐等或以禮許

人或守官假器比於申請其過尤深各罰一季俸料緣
兵興以來勲賞超越其所立戟須有明文宜令所司准
舊制侍官階勲至三品然後申請仍編於格令永為常
式近例立戟者率有銀青階而義方獨據令上柱國官
三品者十二戟無以階叙戟之文牒省司不能詣准
式立戟之後轉為四品官者自非賤授兼判勲階其戟
不奪既而廬坦以前任宣州刺史是三品兼護軍又請
戟立已列於門議者以坦居四品官狀原無據臺司將
劾而未舉吏部尚書鄭餘慶諱練舊章至自東都揚言
于朝以為大不可臺司因移牒詰禮部狀稱今文內只
言勲官並不言階而自貞元以來立戟一十八家並無
銀青色下階者遂以上聞故皆坐罰而申之續放免陸
則崔備元祐一月俸料甲申勅廬坦等所罰錢宜令部

省收貯充省中修補已後別勅量罰並送都省
貯每至歲終奏數其餘贓罰依前御史臺接管

七年十一月丁丑詔自今遇輟朝日中書門下宜同假
日不須入

八年八月壬寅吏部奏請差定文武官告紙軸之物色
五品已上用大花異文綾紙紫羅襪檀木軸六品以下
朝官並內裝寫許與大花綾襪餘小花綾紙通用紫綾
襪檀木軸命婦邑號許用色牋花素紙小花諸色錦襪
紅牙軸其紅地獨窠金錦綠花牋紅花牙撥鏤鈿軸等

除恩賜請並禁斷從之

九年十月戊辰以尚書左丞呂元膺為工部尚書充東都留守舊例命留守必賜旗甲與方鎮畧同及元膺受任竟無所賜朝論以東有寇虞時用元膺尤不當削以沮威望諫官上疏援華汝壽三州例賜戎械居守之重固宜寵賜帝曰此數處並不當與其後遂皆停

十三年八月乙亥詔應同司官有大功已上親者但非連判及勾檢之官並官長則不在迴避改換之限况國

朝故事不少勅令明文具存其官署同職異司雖父子

兄弟亦無所嫌起今已後宜准天寶二年七月六日勅

處分

時刑部員外郎楊嗣復以父於陵戶部侍郎遂以近例避嫌請出省宰臣等舉令式奏請故有是勅

十四年四月橫海軍節度使烏重胤奏臣以河朔能抗

拒朝命者其大畧可見所管刺史失其權與職分反使

鎮將領事若刺史各得職分又有鎮兵則節度使雖有

安祿山史思明之奸惡豈能據一州為反哉所以河朔

六十年能不奉朝命者只以奪刺史權與縣令職守而

自作威福臣所管德棣景三州已舉公牒各還刺史職
事應在州兵并令刺史收管從之

丙寅詔諸道節度都團練防禦經畧等使所管支郡除
本州軍使外別置鎮遏守捉兵馬者並令屬刺史如刺
史帶本州團練防禦鎮遏等使其兵馬名額使隸此使
如無別使即屬軍事其有邊於溪洞接連蠻蕃之處特

建城鎮不關州郡者則不在此限

自艱難以來天下右
武節將權尤重遂於

所管諸郡別置鎮兵以大將主之干擾郡政或為姦
盜其弊日久至是宰臣因烏重胤之請始奏罷之

穆宗元年正月即位三月詔淄青統押海蕃每年皆有朝賀比差部領人數較多今寇盜既夷典章湏守宜以後差此官正試相兼不得過五人

六月賜河中節度使韓弘印一面先是皇甫鏗為相頗排故相李絳罷河中節度使為防禦使而命絳為之至弘復授旌節而以印賜焉

七月平盧節度使秦准勅押加新羅渤海兩蕃請印一面從之

長慶二年八月勅秋夏之間嘗多水潦如緣暮夜遭雨道路不通車駕宜使放其日朝叅委御史臺勾當仍每具聞奏如雨不至甚不在此例

三年五月秘書省監李隨奏請造當司圖書印一面從之

四年二月甲辰勅文武百僚寒食出城及於京畿內拜掃宜令自今月二十六日已後任去餘准長慶二年二月十四日勅處分

敬宗寶歷元年正月特建武昌軍額命宰相牛僧孺為節度使丙辰牛僧孺請奏使印從之

冊府元龜卷六十

欽定四庫全書

冊府元龜卷六十一

宋 王欽若等 撰

帝王部

立制度第二

唐文宗太和元年五月癸酉左神策軍奏當軍請鑄南山採造印一面

二年六月四方館奏請賜印一面仍以中書省四方館為名許之

三年十二月己未以董重質充神策諸道行營西川節度使奏請置印一面從之

四年六月飛龍廐襄城羣牧請鑄印可之

是月左右神策軍奏當軍於鳳翔扶風縣營田採造寶雞縣採造斜谷南山吳山寶雞扶風營田共四所各請鑄印並可之

五年四月內外各省使奏請鑄印從之

是月麟州刺史崔應奏刺史銅魚符貞元十七年蕃寇

陷州城因以失墜自後刺史多是權知因循久不陳請
今請勅所司鑄賜從之

六年六月戊寅右僕射王涯准勅詳度諸司制度條件
等禮部式親王及三品已上若二王後服色用紫飾以
玉五品已上服色用朱飾以金七品已上服色用綠飾
以銀九品已上服色用青飾以鍮石應服綠及青人謂
經職事官成及食祿者其用勲官及爵直諸司依出身
品仍各佩刀礪紛帨流外官及庶人服色用黃飾以銅

鐵其諸親朝賀宴會服飾各依所准品詣司一品二品
許服玉及通犀三品許服花犀及班犀及玉又服青碧
者許通服綠餘請依禮部式諸部曲客女奴婢服通服
青碧其命婦客女及婢聽同庶人奴及部曲請許通服
黃白皂其命婦准格客女及婢得同庶人其衣服婢及
庶人女婦請兼許服夾纈丈夫請通服黃白如屬諸軍
使司及屬諸道任依本色目流例其女人不得服黃紫
為裙及銀泥卷畫錦繡等餘請依令式其袍襖制度三

品已上伏請許服鷓銜瑞草鴈銜綬帶及對孔雀綾袍
襖四品五品伏請許服地黃花及交枝綾六品已上朝
參官許服小團窠綾及無文綾隔織紗獨織等克除此
色外應有奇文異制袍襖綾等並請禁斷其中書門下
省尚書省御史臺及諸司三品官並請勅下後一月日
改易應諸常參官限勅下後兩月日改草餘非常參官
並許五月日改草外州府以勅到日起限其衫布制度
内外文武常參官及供奉官外州府四品已上官請許

通服絲布仍不得有花紋餘請一切禁斷其花絲布及
撩綾除供御外請委所在長吏禁毀訖當日聞奏其不
合服絲布者請勅下後限一月日內並須改易丈夫袍
襖衫等曳地不得長二寸已上衣袖不得廣濶一尺三
寸已上婦人制裙不得濶五幅已上裙條曳地不得長
三寸襦袖等不得廣一尺五寸已上婦人高髻險粧去
眉開額甚乖風俗頗壞常儀費用金銀過為首飾並請
禁斷其粧梳釵篦等伏請勅依貞元中舊制仍請勅下

後諸司及州府榜示限一月內改草又吳越之間織造高頭草履纖如綾縠前代所無費日害功頗為奢巧伏請委所在長吏當日切加禁絕其諸綵帛縵或高頭履及平頭小花草履既任依舊餘請依所司條流准儀制令諸軍一品已下五品已上皆通幘六品已下皆不用幘者令非冊拜及婚會並不用幘又准六典及禮部式諸文武赴朝諸府遵從職事一品及開府儀同三司驃騎大將軍聽七騎二品及特進五騎三品及散官三騎

四品五品兩騎六品已下一騎其散官及以禮去官五品已上將從不得過兩騎若京城外將從不在此限今約品秩職事官一品職七騎二品及中書門下三品五騎三品及中書門下御史臺五品尚書省四品三騎四品五品兩騎鞍通鑰石裝其散官及以禮去官者五品已上不得過一騎若京城外及勲績顯著職事繁重者不在此限七品已下非常參官並不得馬從未任者聽乘屬馬鞍用烏漆裝右請一品二品九騎三品七騎四

品五品兩騎六品一騎其京城應繁重者不在此限六品已下非常參官不得以馬從六品已上非常參官周親未任者聽乘馬餘未任聽乘屬馬小馬鞍用烏漆裝其胥吏雜色人不在此限其鞍轡裝飾所司條流得用銀者四品以下並得許用垂頭押胯其用銀鍮石者並不得用開裝其軍容隊伍要資華飾不在此限餘並依所司條流准少府式公主出降犢車兩乘一金銅裝郡主犢車兩乘一銅裝縣主犢車兩乘一銅裝又准鹵

薄令外命婦一品厭翟車六乘二品三品白銅飾犢車
一從車四乘四品白銅飾犢車一從車二乘者今比附
前件令式參酌今時之宜婦人本來乘車近來率用檐
子事已成俗教在因人今請外命婦一品二品中書門
下三品母妻金銅飾檐子舁不得過八人三品金銅飾
犢車金銅飾檐子舁不得過六人非尚書省御史臺即
白銅飾檐子舁不得過四人四品五品白銅飾犢車白
銅飾檐子舁不得過四人六品已下畫奚車檐子舁不

得過四人胥吏及商賈妻子並不乘奚車及檐子其老

疾者聽乘輦舉

步本反車
橫木也

車及兜籠昇不得過二人庶

人准此右伏緣白銅先已禁斷今請應合用銅者通用

鍤石胥吏商賈妻女老疾者聽乘座車及輦舉車餘並

請准所司條流處分商人乘馬前代所禁近日得以恣

其乘騎雕鞍銀銙裝飾煥爛從以童騎騁以康莊此最

為僭越伏請切令禁斷庶人准此師僧道士除網維及

兩街大德餘並不得乘馬請依所司條流處分准營繕

令王公已下舍屋不得施重拱藻井三品已上堂舍不得過五間九架仍廳廈兩頭門屋不得過三間五架五品已上堂舍不得過五間七架亦廳廈兩頭門屋不得過三間兩架仍通作鳥頭大門勳官各依本品六品七品已下堂舍不得過三間五架門屋不得過一間兩架非常參官不得造軸心舍及不得施懸魚對鳳瓦獸通欂乳梁裝飾祖父舍宅蔭子孫雖蔭盡仍聽依舊居住天下士庶公私第宅皆不得造樓閣臨視人家近者或

有不守勅文因循製造自今已後伏請禁斷庶人所造堂舍不得過三間四架門屋不得過一間兩架下仍不得輒施裝飾准律諸營造舍宅于令有違者杖一百雖會赦皆令改正之其物可賣者聽賣若經赦後百日不改去及賣論如律又准大歷六年十二月十一日勅京城內坊市宅舍輒不得毀拆今若頓令改去恐為倍費其已成者許不毀拆自今已後宜令禁斷應制度衣服車乘器用宮室等其諸軍諸使職掌官等並請約文武

官例各委本軍本使以職掌高下約為等第比類聞奏
應三省御史臺兩京諸司及諸道在城職掌官等諸不
許用本官本品例仍並不得服犀玉及車馬不得飾以
金銀應諸色條件伏請委御史臺知彈御史兩巡使京
兆尹及東都留守河南尹留臺御史外州府長史准條
件月日切加糾察如有違越沒入所犯物仍量加決責
其常參官品聞奏其在城諸軍諸使各委本司勾當如
本司勾當不及者委臺司覺察聞奏以前臣涯等奉勅

令臣等同為詳定酌中奏聞者伏以法惟無作作則必行
令貴在寬寬則可久今臣等約所司條件令式舊章從俗
酌宜務遵中道詔曰理道所關制度寢切近者風俗踰侈
歲月滋甚人隳本業用多費財爰命有司載舉彛制務從
簡朴度可久行將使尊卑有倫刑罰少息其喪葬婚嫁吉
凶禮物皆有著定尤聞僭差雖不在條件之物亦委所司
准令式勾當仍切加捉搦不得輒有容縱軍國異容古今
通禮禁軍仗衛雜飾及諸道節度等使應緣軍裝衣服即

不在此限或有留令慢法委御史臺彈奏當坐長吏用清
類風帝自御極躬自儉約將革奢侈之弊遂命有司示以
制度勅下之後浮議囂騰京兆尹杜棕於勅內條件易施
行者奏請仍寬其限事竟不行公議惜之

八年八月乙酉詔常參官私事請假者罷給乘傳

九年三月庚午左丞庾敬休卒癸酉詔曰官至丞郎皆朕
所委不幸云亡宜其為之廢朝况朝會班列本在諸司三
品之上比限近勅或乖通理昨因敬休殞喪載深傷惻自

今丞郎宜准諸司三品官例罷朝一日

九月甲子詔京諸司少卿監少尹等並大卿監大尹分
曹視事同裨大政河南太原等七州少尹及大都督府
左右司馬諸州上佐等亦如之並從憲司之請

十二月勅創造諫院印一面以諫院之印為文

諫院舊無印苟

有章疏各於本司請印諫官有印人多知之至是特勅
置印兼詔諫臣凡所論事有闕機密宜別以狀列之不
須以官
銜給署

開成元年五月集賢殿御書院請鑄小印一面以御書

為文

二年十二月幽州節度使史元忠奏當管八州准門下牒追刺史右魚各一隻臣勦自天寶末年頻有兵戈並多失墜伏乞各賜新銅魚可之

三年四月中書門下奏宰相帶平章事出鎮請朝官為幕府自今已後不得過五人官至侍御史已上即許兼奏章服從之

武宗會昌三年五月勅諸道節度使隨身不得過六十

人觀察使不得過四十人經畧都護不得過三十人永
為定式

宣宗大中四年五月御史臺奏准今年正月一日節文
今欲條流京百司見任官但請假徃處計程限一月已
上者便請從發日准節文逐貫尅二百文充給承後判
察官如在一月內參假者不在此限從之

五年正月中書門下奏加恩使請准會昌三年六月勅
所受禮例不過三千疋仍請頒示天下諸道從之

哀帝天祐二年四月詔曰東上西上二閣門制置各別
至於常事則以東上居先或大忌進名遂用西閣為便
同於禮式何表區分頃緣閣監擅權乃以陰陽取位不
思南面但啟西門邇來相承未議更改詳其稱謂似爽
舊規自五月一日已後常朝取東上閣門或遇忌日奉
慰即開西上閣門永為定制

三年六月勅文武百寮每月一度入閣於貞觀大殿朝
廷正衙遇正至之辰受羣臣朝賀比來視朔未正規儀

今後於崇勳殿入閣付所司

後唐莊宗同光二年正月辛亥中書奏准本朝故事如
封建諸王內命婦及宰相翰林學士中書舍人諸道節
度觀察團練防禦留後郎中書帖官告索綾紙票軸下
所司書寫印署畢進入宣賜其文武兩班並諸道官負
及奏薦將校勅下後並合是本道進奏院或本官自於
所司送納朱膠綾紙價錢各請出給伏自偽廷昏隳本
朝事例每降文字下中書不分別重輕便令官給告示

遂致所司公事全失規程自今後如非前件事例並請
官中不給告示其內司大官並侍衛及賞軍功將校轉
官即不在此限所異受宣賜者倍榮恩渥非事例者不
敢希求一則致顯辨尊卑一則免無名費耗從之

二月詔應於諸道見使斗秤並是偽朝所定宜令所司
別造新朝斗秤頒下諸道其見使者納官毀廢

八月中書奏偽廷之時諸藩參佐皆從除授自今後諸
道除節度副使兩使判官除授外其餘職負並諸州軍

事判官各任本處奏辟其軍事判官仍不在奏官之限
所冀招延之禮皆合於前規簡辟之間無聞於濫舉從
之

九月詔今後支郡公事須申本道本道謄狀奏聞租庸
使合有徵催只牒觀察使貴全禮體

三年正月戊戌勅兵吏部以臺省禮錢為名所司妄有
留滯在京者遽難應付外來者固是淹延須至條流冀
絕訛弊自此後特恩授官侍衛軍功改轉內廷諸司帶

職外來進奉闕廷綾紙並宜官給無令收買舊例朱膠
一切停廢禮錢亦不徵取又慮所司困闕人吏不辦食
直糧課逐月兩司各支與錢四十貫文至於臺省禮錢
宜特蠲減比舊數五分許徵一分其特恩已下並不得
徵納禮錢仍令中書門下條流勅畫經過諸司無至停
滯其官告如是宣旨除授及品秩合進呈者准例送回
餘並送納中書門下點檢給付勅書到本司十通已上
官限三日內印署了三十通已上限五日五十通已上

中書門下與催促如臨時緩急宣賜不拘此限少府監鑄造印文元屬禮部兩司無有推注停滯諸道使臣廣徵銅炭價錢納後別須邀索自此凡鑄印宜令本司限勅到五日内進呈不計諸道在京並不得徵納銅炭價錢所破料物並計數於租庸院請領仍預常給付價錢使盡計帳于租庸院更請或有故違必行典憲

明宗天成元年七月辛未勅三京諸道節度團練防禦使刺史文武將吏州縣職負皆進月旦起居表起今已

後除節度使留後團練防禦使唯正至進賀表其四孟
月並可止絕式叶舊儀八月勅藩鎮幕職皆有舊規奏
薦官寮須循前例苟或隳紊難止弊訛承前使府奏請
判官率皆隨府除移府罷亦罷近年流例有異前規使
府雖已除移判官原安舊職起今已後若是朝廷除授
者即不許使府除移如是使府奏請即皆隨府移罷舊
例藩侯帶平章事者所奏請判官殿中丞已上許奏緋
中丞已上許奏紫令不帶平章事處亦同帶平章事例

處分如防禦團練使奏請判官自負外郎以下不在奏
緋之限其所奏判官州縣官並須將歷任告身隨奏至
京如未曾有官假稱試攝亦奏狀內分明署出如藩鎮
留後及權知軍州事並不在奏請判官之限如刺史要
奏州縣官須中本道請發表章不得自奏近日判官奏
請從事本無官緒妄結虛銜不計職位高卑多是請兼
朱紫不唯紊亂實啟倖求宜令通下諸道州府切准勅
命處分十一月甲戌吏部侍郎劉岳奏凡在立朝悉是

為臣之責每蒙進秩咸加報上之忠奉勅命以遷升固當感抃降綸言而褒飾或未捧觀將使知罷陟之繇認訓誥之旨必在各頒官告令規制詞處班列以增光傳子孫而永耀伏請自今凡有除轉登朝官已上在京閣門宣賜在外則付本州使賜之勅旨朝官素有品秩不可一例頒宣文班三品已上丞郎給舍諫議武班大將

軍已上宜賜官告

舊例吏部出告身納出朱膠紙軸錢分給朝臣或親舊者隨即給付而官

貧不辨者但領勅牒而已喪亂之後因以為常朝臣多不出告身制下之後中書但收其制辭編為勅甲本官

不見獎飭之詞故有是奏勅旨不編班得事體也其後執政者相與謀罷朱膠紙軸之例以為天下史官無多除拜以簡給膠軸之費歲不過數萬國家既錫以祿位而邀其膠紙之直是巨細不相稱也因奏覆凡中外官除拜並宣賜官告然執政之議雖善蓋圖其始不料其終何者同光世至天成初官爵之命在於除授中外正貲官其餘侍御帖號則寵徽軍中將校而已自長興已來除授日多上至軍中卒伍下迨州使鎮戍簿籍胥吏之流皆有銀青官憲之號每歲給賜告身動盈數萬非止膠紙之虛費財力而又賞激之道難以勸功以臣料終則知執政圖始之非善也勸作事謀始凡執政者慎圖之

二年正月詔曰亂離斯久法制多隳不有舉明從何禁止而衣服羈馬之流多踰品式起今後三京及州使職

負名目是押衙兵馬使指揮使騎馬使得有暖坐諸部
軍將衙官使下係名籍者只得衣紫皂庶人商旅只著
白衣此係不得參雜兼有富戶或投名於勢要以求影
庇或希假攝貴免丁徭湏議條流以懲踰越如有此色
人仰所在禁勘追索所受文書申奏當行嚴斷以肅奸
欺

四年正月中書奏凡外朝官此後並令中謝從之

長興元年七月勅諸道得替防禦團練等使及刺史到

京朝見後並宜班行比擬如未有負闕可令隨常參官
逐日至

十月給事中崔衍奏當省給納諸州銅魚勘問本行令
史狀稱內庫每州有銅魚八隻一隻大七隻小兩隻右
五隻左其右銅魚一隻長留在內留一隻在本州庫逐
季申報平安左魚五隻皆鐫次第字號每新除刺史到
郡後即差人到當省請領左魚當司覆奏內庫次第出
給左魚一隻當省責領分付到州集官吏取州庫右魚

契合却差人送左魚納省如別除刺史州司又請次第
左右周而復始臣以州司差人請魚往來須有煩費請
此後所除刺史在京受命或經過都城者可令自牒當
省請左魚齋歸本郡契合然後差人納省勅異稍免煩
勞從之

二年四月己巳勅朝臣居喪終制委御史臺具姓名申
奏諸道賓從除喪後各宜行恩命州縣官纔受新命及
到任一考前丁憂者服闋日除官

十月丙寅勅皇王御宇切在推恩臣下盡忠昏思勵節
顯祖宗於奕世耀妻子以榮家位有高低事無偏黨方
當景運務洽羣心將弘莫大之規宜定維新之制自此
在朝臣寮及藩侯郡守據理例合得追贈者新受命後
便於所司投狀旋與施行封妻蔭子准格合得者亦施
行兼自中興以來外官曾任朝班據在朝時品秩格例
合得封贈叙封未霑恩命者並與施行其叙封妻室品
蔭子孫等仍令所司一一具格式申奏其或應得而不

與之者罪在所司官吏其餘進馬齋郎遇有負闕據資
陰合得先受官者先與收補後受官者據日月依次第
施行如或徇私公然越次本人本司官吏當行責罰仍
令御史臺常加訪察不得輒有違越庶激為臣為子盡
孝盡忠各守公方共裨皇化

三年正月戊申中書門下奏見任宰臣四員外其餘諸
使兼侍中中書令平章事並是使相向來班序皆在見
任宰臣之下今緣秦王從榮是親王新加兼中書令與

諸使相不同每過排班及到中書位次今特商議伏以政事之權雖崇四輔周行之列亦長諸王宜顯奉於本枝固不同於異姓今後望請親王官至兼侍中中書令則與見任宰臣分班定位宰臣居左諸王兼侍中中書令居右如親王及諸使守侍中中書令亦並是使相既不知印不著勅亦分行居右其餘使相請依舊規從之
壬子太常禮院奏衣服制度准

貞觀四年八月十四日詔曰冠冕制度已備令文彛常

服飾未為差等於是三品已上服紫四品五品已上服
緋六品七品以綠八品九品以青婦人從夫之色仍通
服黃至五年七月一日勅七品已上服龜甲雙巨十花
綾其色綠九品已上服絲布及雜小綾其色青又咸亨
五年五月十日勅如聞在外軍人百姓有不依令式遂
於袍衫之內着朱紫青綠等色短衫襖子或在閭野公
然露服貴賤莫辨有蠹彝倫自今已後衣服上下各依
品秩上得通下下不得僭上仍令所司嚴加禁斷

又武德四年七月十六日制三品已上服大料細綾及羅其色紫五品已上服小料細綾及羅其色朱六品已上服絲布雜小綾交梭其色黃七品八品九品流外庶人服細綾絕布其色黃白者又永徽三年八月十四日詔魚袋之制恩榮所加本緣品命帶魚之法事章要重者臣今詳酌本非朝命不得輒懸魚袋內外臣寮所衣朱紫服飾降於近代不越時宜將健衣裝各立軍號當司從來無例檢詳其經商百姓等則不得著色樣綾羅

及紫皂雜色衣服金色帶亦不載短長制度勅旨禮所
奏內外臣僚所衣朱紫服飾不越時宜將健衣裝各立
軍號一切仍舊其經過百姓不得著色樣綾羅及紫皂
雜色衣服金色帶等宜依

四月甲寅勅諸道節度都護防禦團練等使及刺史到
朝廷未有班位定規起今後不帶使相節度使班位可
取使相班為例據檢校官高者為上如檢校同即以先
授者為上其諸州防禦團練使刺史亦准此仍前資居

見任之下

愍帝應順元年三月故忠武軍節度使孟鵠男遵古上言乞立先臣神道碑詔今後藩侯帶同平章事已上薨謝者竝差官撰文宣賜未帶相印及刺史以令式合立碑者其文任自製撰不在奏聞

末帝清泰二年三月辛亥兩街功德使雍王重美奏每
年誕節諸道州府奏薦僧尼道士紫衣師號漸多今欲
量立條式僧講論講經表白各三科文章應制十二科

持念一科禪聲贊科竝於本伎能中條貫道士經法科
試義十道講論科試經論文章應制科試詩表白科試
聲喉聲贊科試步虛三啟焚脩科試齋醮儀詔曰重美
學洞儒玄官居尹正因三教之議論希千春之渥恩特
立條流以防濫進從之

晉高祖天福二年四月己亥詔今後立妃及拜免三公
宰相及命將封親王公主宜令并降制命餘從令式處
分甲辰中書奏以二月二十六日勅內外官臣僚亡父

母祖父母據品秩未封贈已封贈三代者更加恩命按舊制一品官亡父已上三代約其子官品第降一等亡母追封國號祖母已上第降一等勅曰自家刑國歷代明規祖德宗功前王至訓在君上之尊則異在臣下之孝皆同凡有公田竝立私廟自經多難不舉舊章今以應運開基體元布化不思奉已專務安人高低推念祖之誠內外保貽孫之慶其內外官等准勅合與三代已下封贈者竝以見居官品數比擬真使人之例不輕王

父之尊永載簡編普示孝理是月中書奏翰林志節文
凡赦書德音立后建儲行大誅討拜免三公宰相命將
日制竝使白麻紙不使印雙日起草候閣門之鑰入而
後進隻日百僚立班於宣政殿樞密使引案自東上閣
門出若拜免宰相即委通事舍人餘付中書門下竝通
事舍人短步而宣出機要速亦使雙日甚者雖休假退
朝而出之勅曰九五之尊億兆所賴法天敷化師古宣
風宜循歷代之規以補前王之闕今據翰林志言立后

不言立妃言儲君不言親王公主兼三師位在三公之上亦不在其間起今後立妃及拜免三公宰相及命將封親王公主宜令並降制命餘從令式處分

閏七月壬申尚書戶部奏李自倫義居七世准勅旌表門閭先有登州義門王仲昭六代同居其旌表有廳事步欄前列屏樹烏頭正門閭闊一丈二尺二柱相去一丈柱端安瓦桶墨染號為烏頭築雙闕一丈在烏頭之南三丈七尺夾衝十有五步槐柳成列今舉此為例則

令式不該詔王仲昭正廳烏頭門等事不載令文又無
勅命既非故事難躐大倫宜從令式只表門間於李自
倫所居之前量地之宜高其外門門安棹楔門外左右
各建一臺高一丈二尺廣狹方正稱臺之形勢以白泥
四隅染赤其行列樹植隨其事力其同籍簿課役一准
令式

十一月戊午中書奏准雜令車駕巡幸所州縣官人見
在駕所祇承賜會竝同京官可之

三年五月勅舊制內外臣僚據官品私門合立戟事將相之崇朝廷所重並輸忠節仰奉宗祧宜旌佐國之功顯示榮家之慶應中外臣僚帶平章事侍中中書令及諸道節度使並許私門立戟仍並官給并各賜詔書仍據官品依令式處分

七月中書奏准勅製皇帝受命寶今按唐書貞觀十六年太宗刻受命玄璽白玉為螭首其文曰皇天景命有德者昌勅曰受命寶宜以受天明命惟德允昌為文

按受

命寶者天子修封禪禮神祇則用之其始皆破皇業錢以製之皇業者藩邸王事之所有

七年二月甲辰勅應內外諸司諸使及諸道州府凡有諸色公事須具奏聞今後不得將白狀及劄子記事申覆如事關機密即准先降宣命寶封斜角不題事目通下其合申中書及中書勘會公事所申狀亦須是本司及逐處官員印署不得將白狀及記事劄子兼令司局抄劄供申宜令御史臺及宣徽院三司衛司諸道州府切准此指揮

少帝天福七年六月即位九月勅曰留守之任委寄非
輕凡降絲綸宜同將相起今後除授留守宜降麻制仍
付所司

開運三年正月詔改鑄天下合同印書詔印御前印並
以黃金為之

漢隱帝乾祐三年五月詔諸道州府差置散從官大府
五百人上州三百人下州二百人勅本處團集官係立
節級檢校教習以警備州城

周太祖廣順元年三月辛卯勅職當參佐位列賓僚苟無職馭之人頗異築臺之禮雖事因改易而理未酌中宜降明文庶永為制副留守節度副使行軍兩京少尹留守判官兩使判命竝許差定當直人力不得過十五人節度推官防禦團練軍事判官不得過十人諸府少尹書記友使防禦團練副使不得過七人竝取本廳舊當職人力數少不及新定數目只仰依舊人數差定仍令逐處係帳收管此外如敢不遵條制多有占差額外

影占人戶其本官當行朝典

漢隱帝時有人言府州從事令錄皆請料錢自合僱人
驅使不合差遣百姓丁戶秉政者然之下詔州府從事
令錄本處先差職役竝速放散歸農不得差為參從貧
官有獨行趨府者太祖頗知之故有是命

三年七月丁酉勅賦稅婚田比來州縣之職盜賊烟火
元係巡鎮之司各有區分不相踰越或侵職分是紊規
繩切慮所在職員尚循舊弊須行餘貫以正紀綱京兆

鳳翔府同華邠郿耀等州所管州縣軍鎮頃因唐末藩鎮殊風久歷歲時未能釐革政途不一何以教民其婚田聽訟賦稅丁徭合是令佐之職其擒奸捕盜庇護部民合是軍鎮警察之職今後各守職分專切提撕如所職踈遺各行按責其州府不得差監徵軍將下縣庶期靜辦無使煩勞

世宗顯德四年七月甲辰詔曰准令諸田宅婚姻起十一月一日至三月三十日州縣爭論舊有釐草每至農

月貴塞訟端近聞官吏因循繇此成弊凡有訴競故作逗留至時而不與盡詞入務而即便停罷強猾者因此得志孤弱者無以自伸起今後應有人論訴物業婚姻取十一月一日後許陳詞狀至三月三十日權停自三月三十日已前如已有陳詞至權停日公事未了絕者仰本處州縣亦與盡理勘逐須見定奪了絕其本處官吏如敢違慢竝當重責其三月一日後至十月三十日如有婚田詞訟者州縣不得與理若是交相侵奪情

理妨害不可停滯者不拘此限

五年十月癸卯鑄奉使印五十面

六年三月癸酉勅銅魚之設雖載前編原其始初蓋防
偽濫今諸道牧守每遇除移竝特降放制書又何假於
符契如聞請納頗是煩勞宜易前規罷茲虛器其銅魚
竝宜停廢

冊府元龜卷六十一